

FRAMSELD REGLUGERÐ FRAMKVÆMDASTJÓRNARINNAR (ESB) 2021/1335 2022/EES/72/39**frá 27. maí 2021****um breytingu á reglugerð Evrópuþingsins og ráðsins (ESB) 2019/787 að því er varðar merkingu brenndra drykkja sem kemur til vegna samsetningar brennds drykkjar og einna eða fleiri matvæla (*)**

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) 2019/787 frá 17. apríl 2019 um skilgreiningu, lýsingu, kynningu og merkingu brenndra drykkja, notkun heita brenndra drykkja í kynningu og merkingu annarra matvæla, vernd landfræðilegra merkinga fyrir brennda drykki, notkun etanóls og eimis úr landbúnaði í áfenga drykki og um niðurfellingu á reglugerð (EB) nr. 110/2008 ⁽¹⁾, einkum 3. mgr. 50. gr.,

og að teknu tilliti til eftirfarandi:

- 1) Í 3. mgr. 11. gr. reglugerðar (ESB) 2019/787 er mælt fyrir um reglur um lýsingu, kynningu og merkingu á áfengum drykkjum sem fást með því að setja saman flokk brennds drykkjar eða landfræðilega merkingu fyrir brenndan drykk með öðrum matvælum. Slíkum áfengum drykkjum er lýst með samsettum hugtökum sem sameina annaðhvort lögheiti sem er gefið upp í flokkum brenndra drykkja, sem eru settir fram í I. viðauka, eða landfræðilega merkingu brennds drykkjar með heiti annarra matvæla.
- 2) Í 3. mgr. 11. gr. reglugerðar (ESB) 2019/787 er þess ekki krafist að heiti áfenga drykkjarins sem verður til sé birt á sama sjónsviði og samsetta hugtakið. Þetta getur valdið því að neytendur telji að samsetta hugtakið sé hið raunverulega heiti áfenga drykkjarins þar sem orðspor flokka brenndra drykkja eða landfræðilegra merkinga er misnotað með óréttmætum hætti, einkum þegar áfengi drykkurinn sem verður til er brenndur drykkur.
- 3) Í 1. mgr. 7. gr. reglugerðar Evrópuþingsins og ráðsins (ESB) nr. 1169/2011 ⁽²⁾ er þess krafist að matvælaupplýsingar séu ekki villandi einkum að því er varðar eðli og aukenni matvællanna. Í 9. gr. þeirrar reglugerðar er kveðið á um að gefa skuli upp lögboðnar matvælaupplýsingar, þ.m.t. heiti matvæla, og í 13. gr. reglugerðarinnar er þess krafist að lögboðnar upplýsingar séu settar á áberandi stað og þannig að þær séu auðsjáanlegar, auðlæsilegar og, þegar það á við, óafmáanlegar.
- 4) Í samræmi við 9. gr. reglugerðar (ESB) 2019/787 gilda kröfur er varða kynningu og merkingu sem settar eru fram í reglugerð (ESB) nr. 1169/2011 um áfenga drykki sem verða til vegna samsetningar brenndra drykkja og annarra matvæla. Til að tryggja að þessar kröfur verði uppfylltar á sem bestan hátt, einkum að því er varðar brennda drykki sem verða til vegna slíkra samsetninga, þykir rétt að krefjast þess að lögheiti brennda drykkjarins sem verður til birtist á sama sjónsviði og samsetta hugtakið sem lýsir þeirri samsetningu. Slíkt ætti að vera gert í hvert skipti sem samsett hugtak er tilgreint í lýsingunni, kynningunni eða merkingunni á brenndum drykki. Þetta mun koma í veg fyrir blekkjandi aðferðir og tryggja að neytendur séu upplýstir á tilhlýðilegan hátt varðandi raunverulegt eðli brennda drykkjarins sem verður til vegna samsetningar brenndra drykkja og annarra matvæla.
- 5) Þessi skuldbinding ætti þó ekki að gilda þegar lögheiti brennda drykkjarins er skipt út fyrir samsett hugtak, í samræmi við b-lið 5. mgr. 10. gr. í reglugerð (ESB) 2019/787, sem inniheldur hugtakið „líkjör“ eða „cream“, að því tilskildu að fullunna varan uppfylli kröfurnar fyrir flokk 33 í I. viðauka þeirrar reglugerðar.

(*) Þessi ESB-gerð birtist í Stjtið. ESB L 289, 12.8.2021, bls. 4. Hennar var getið í ákvörðun sameiginlegu EES-nefndarinnar nr. 241/2022 frá 23. September 2022 um breytingu á II. viðauka (Tæknilegar reglugerðir, staðlar, prófanir og vottun) við EES-samninginn (bíður birtingar).

(1) Stjtið. ESB L 130, 17.5.2019, bls. 1.

(2) Reglugerð Evrópuþingsins og ráðsins (ESB) nr. 1169/2011 frá 25. október 2011 um miðlun upplýsinga um matvæli til neytenda, um breytingu á reglugerðum Evrópuþingsins og ráðsins (EB) nr. 1924/2006 og (EB) nr. 1925/2006 og um niðurfellingu á tilskipun framkvæmdastjórnarinnar 87/250/EBE, tilskipun ráðsins 90/496/EBE, tilskipun framkvæmdastjórnarinnar 1999/10/EB, tilskipun Evrópuþingsins og ráðsins 2000/13/EB, tilskipunum framkvæmdastjórnarinnar 2002/67/EB og 2008/5/EB og reglugerð framkvæmdastjórnarinnar (EB) nr. 608/2004 (Stjtið. ESB L 304, 22.11.2011, bls. 18).

- 6) Því ætti að breyta reglugerð (ESB) 2019/787 til samræmis við það.
- 7) Kveða ætti á um umbreytingartímabil að því er varðar beitingu ákvæðanna um merkingu sem mælt er fyrir um í þessari reglugerð til að gera það kleift að setja brennda drykki, sem eru merktir fyrir 31. desember 2022 í samræmi við ákvæði reglugerðar Evrópuþingsins og ráðsins (EB) nr. 110/2008 ⁽³⁾, á markað án þess að gerð sé krafa um endurmerkingu þeirra.
- 8) Í samræmi við 3. mgr. 51. gr. reglugerðar (ESB) 2019/787 og til að koma í veg fyrir reglusetningarlegt tómarúm ætti þessi reglugerð að gilda afturvirktt frá og með 25. maí 2021.

SAMÞYKKT REGLUGERÐ ÞESSA:

1. gr.

Í stað 3. mgr. 11. gr. reglugerðar (ESB) 2019/787 kemur eftirfarandi:

„3. Samsett hugtök sem lýsa áfengum drykk skulu:

- a) birtast með samræmdum bókstöfum í sömu leturgerð, stærð og lit,
- b) ekki brotin upp með neinum texta eða myndrænum þætti sem ekki er hluti af þeim,
- c) ekki vera með stærra letri en letrið sem notað er fyrir heiti áfenga drykkjarins og
- d) ef áfengi drykkurinn er brenndur drykkur, standa ásamt lögheiti brennda drykkjarins, sem skulu birtast saman á sama sjónarsviði og samsetta hugtakið, nema ef lögheitinu er skipt út fyrir samsett hugtak í samræmi við b-lið 5. mgr. 10. gr.“

2. gr.

Halda má áfram að setja á markað brennda drykki sem ekki uppfylla kröfurnar sem mælt er fyrir í d-lið 3. mgr. 11. gr. reglugerðar (ESB) 2019/787, eins og henni er breytt með þessari reglugerð, en uppfylla kröfurnar í reglugerð (EB) nr. 110/2008 og voru merktir fyrir 31. desember 2022, þangað til birgðir eru uppnar.

3. gr.

Reglugerð þessi öðlast gildi á þriðja degi eftir að hún birtist í *Stjórnartíðindum Evrópusambandsins*.

Hún kemur til framkvæmda frá og með 25. maí 2021.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 27. maí 2021.

Fyrir hönd framkvæmdastjórnarinnar,

Ursula VON DER LEYEN

forseti.

⁽³⁾ Reglugerð Evrópuþingsins og ráðsins (EB) nr. 110/2008 frá 15. janúar 2008 um skilgreiningu, lýsingu, kynningu, merkingu og vernd landfræðilegra merkinga á brenndum drykkjum og niðurfellingu á reglugerð ráðsins (EBE) nr. 1576/89 (Stjtíð. ESB L 39, 13.2.2008, bls. 16).